

‘Prensa Latina’ a enfatisa e importancia di delegacion di Camara di Comercio na Cuba



ORANJESTAD – Informacion divulga pa medio di agencia oficial di noticia na Cuba, esta Prensa Latina, a referi na e bishita cu recientemente un delegacion di Camara di Comercio di Aruba (KvK) a realisa na e isla aki.

Prensa Latino a informa cu presidente di KvK, Daphne Agius Cesareo-Lejuez a expresa su satisfaccion y esun di e 22 empresario cu a compania e delegacion aki, ya cu nan tabatin intercambianan fructifero cu nan coleganan

Cubano.

“Nos ta dos nacion cu nos por yuda otro mutuamente, pues nos ta den e mesun region y nos ta comparti cultura y historia comun”, asina presidente di KvK a declara na Prensa Latina.

Cesareo-Lejuez a declara na Prensa Latina cu nan a realisa dos seccion pa identifica nan oportunidadnan y interes comun dilanti e oportunidad potencial cu Cuba ta exhibi cu su apertura na e investigacion stranhero y negoshinan conhuntito.

Sector economico comun

Prensa Latina a informa cu e delegacion di empresario di Aruba a conoce mas riba e caracteristica di e mercado Cubano.

Nan tabatin contacto cu representantenan di entidadnan Cubano envolvi fundamentalmente den e sector di turismo, construccion y servicio. Un sector cu Aruba lo por siña hopi di Cuba ta riba e tereno di salud y educacion.

Nan a laga sa cu e representante di KvK a comenta cu despues cu Merca a anuncia

cu lo reestablece nan relacion diplomatico cu Cuba, Aruba ta masha interesa riba loke esaki lo nifica den futuro pa economia y comercio den nos region. Tambe nan a bay cu cantidad di informacion riba e transformacion economico y social cu ta tumando luga na Cuba.

Nan tabata interesa particularmente riba e leynan of cuadro legislativo cu lo bay regula e apertura na e inversion stranhero. Tambe riba

e sectornan cu Cuba tin mas prioridad pa desaroya y e sectornan cu Aruba lo por establece vinculo bilateral cu Cuba.

Prensa Latina a destaca cu e presencia di e delegacion aki di KvK a coincide cu e bishita cu Minister Otnar Oduber di Transporte, Turismo, Cultura y Agricultura a realisa na Cuba. Ambos delegacion a yega Cuba cu e vuelo inaugural di Insel Air entre Cuba y Aruba. □